

ՎԱՆԻ «ԱՇԽԱՏԱՆՔ» ՇԱՐԱԹԱԹԵՐԹԸ (1910 – 1915 թթ.)

ՀՈՎՍԵՓԵԱՆ Մ. Վ.

1910-1915 թթ. Վանում լույս է տեսել «Աշխատանք» գրական, քաղաքական և տնտեսական շաբաթաթերթը: Խմբագիրը ՀՅԴ անվանի դեմքերից մեկն էր՝ Բշխան Միքայելյանը: Թեև շաբաթաթերթը ՀՅԴ պարբերական մամուլի տեղական օրգանն էր, բայց չունեւ խիստ ընդգծված կուսակցական դիմագիծ: Այն ոչ թե ՀՅԴ պաշտոնաթերթն էր, այլ՝ կուսակցական հրատարակություն, որը լուսա- բանում էր Վանի վիլայեթի հիմնախնդիրները, ներքին կյանքն ու առօրյան, նաև փորձում էր համախմբել ընթերցողներին՝ հանուն հայապահպանության և ազգային նպատակների իրականացման: Սկզբնական շրջանում, ինչպես բնորոշ էր այդ ժամանակաշրջանում Թուրքիայում հրատարակվող հայկական թերթերին ու ամսագրերին, «Աշխատանքը» տարված էր համընդհանուր բարեփոխումների և արևմտահայերի իրավահավասարության հովերով: 1913 թվականից սկսած՝ շաբաթաթերթի խմբագրակազմն արդեն այն կարծիքին էր, որ երիտթուրքական կառավարությունը շարունակում է Աբդուլ Համիդի հայասպան ու հակահայկական քաղաքականությունը: «Աշխատանքը» տեղական խնդիրներ վերհանող պարբերականից աստիճանաբար վերածվում է համահայկական մտահոգություններով ապրող և շնչող պարբերականի: Այն քաղաքականապես հասունացել էր և այլևս չէր վստահում թուրքական իշխանությունների երկդիմի քաղաքականությանը հայերի հանդեպ: Հրատարակության վերջին ամիսներին «Աշխատանքը» դառնում է 1915 թ. Վանում տեղի ունեցած պատմաքաղաքական դեպքերի վավերագիր փաստաթուղթ: Շաբաթաթերթի էջերում «Օրը օրին» խորագրի ներքո արձանագրված են Վանի հերոսական ինքնապաշտպանության, վանեցիների հաղթանակի դրվագները, նաև խոսվում է քաղաքի ինքնավարության, վերջին օրերի իրադարձությունների մասին:

«Աշխատանքը» պաշտպանում էր ազգերի իրավահավասարության սկզբունքը, որը հատկապես 1908-1909 թթ. տարփողվում էր Թուրքիայում: Յուրաքանչյուր ազգ Թուրքիայում ուներ ազգային դիմագիծը պահպանելու սահմանադրական իրավունք, որն այդպես էլ մնում էր միայն թղթի վրա: «Մեր նպատակը» խմբագրականում շաբաթաթերթը գրում է, որ կողմնակից է «լայն ազգայնական իրաւունքի տեսակետին», բայց միանգամայն հակառակ է «նեղ ազգայնական ու կրօնական ձգտումներին, որոնք կը հասնին շօվէնութեան: Թերթը հնարավորութեան ոյժերի ու պայմանների թոյլատրութեան չափով պիտի արձագանք տար հասարակական բոլոր խնդիրներին՝ միշտ առաջադիմական, լայն-ազատական տեսակետից առաջնորդելով»¹: «Աշխատանքը», սակայն, հավակնոտ չէր և համոզված էր, որ չի կարող նպաստել իր հրապարակումներում, հողվածներում ու վերլուծականներում բարձրացված

¹ Աշխատանք, Վան, 1910, N 1, էջ 6:

խնդիրների լիարժեք լուծմանը, քանի որ «գավառական թերթից այդքան պահանջելն անելորդ էր»: Շաբաթաթերթը համոզված էր, որ անկախ ամեն ինչից՝ ամեն պարագայում հավատարիմ էր մնալու դավանած սկզբունքներին՝ «հաւատալով, որ պետական, հասարակական կազմաձևի, նոր մտածողության մեջ կաւելացնի մի հաստատուն անկիւնաքար»²: 1910 թ. գրում էր, որ, իբրև գավառական պարբերական, ինքն անկարող է խորությամբ ներկայացնել Բալկանյան կնճիռն ու Հայկական հարցի զարգացումները, բայց նաև ինչ-որ չափով պաշտպանում էր Բալկանյան ժողովուրդների անկախացման ձգտումների նկատմամբ թուրքական պետության մոտեցումը: Այսինքն՝ զգուշավոր քաղաքականություն էր որդեգրել Հայկական հարցի լուսաբանման առումով: «Վերջին ժամանակներս Բալկաններից ապստամբութիւնների լուրեր ենք ստանում: 100 տարուց ավել է այդ ճգնաժամն ու հարստահարած ազգերն ու ժողովուրդները գէնքի ու ապստամբութեան միջոցին են դիմում, յանուն իրենց խլած ու բռնաբարւած իրաւունքի... Եւ այդ բոլորը մի այնպիսի ժամանակ, երբ մենք կարօտ ենք խաղաղութեան, նւիրւելու ստեղծագործիչ աշխատանքի և շինիչ գործի», - գրում էր «Բալկանյան կնճիռներ» հոդվածի հեղինակը՝ Անցորդը³: Երիտթուրքական հեղաշրջումից հետո այդ օրերին հատուկ հասարակական-քաղաքական իրադրության յուրօրինակ ընկալմամբ էր պայմանավորված հոդվածագրի հավատն ազգային հարցի լուծման նկատմամբ՝ համաթուրքական բարեփոխումների շրջանակում. «Կամաց-կամաց կը վերանան այդ ցնցող ու Թուրքիայի նօրմալ զարգացմանը խոչընդոտ հանդիսացող երեւոյթները, եթէ առաջնորդուեն միայն Օսմանեան հայրենիքի եւ նրա բաղկացուցիչ մասնիկների առաջդիմութեան, վերջնական երջանկացման տէսակէտից»⁴: Այս մոտեցումն ընկած էր «Աշխատանքի» քաղաքական վերլուծությունների և ներքին ու արտաքին տեսությունների հիմքում: Այն բխում էր ՀՀԴ մարտավարությունից և Արևմտյան Հայաստանի համար կուսակցության որդեգրած ծրագրային դիրքորոշումից: Մինչև արևմտահայերի զանգվածային ջարդերը «Աշխատանքը» շարունակում էր չղավաճանել կուսակցական պատգամներին և դրանով թելադրվող սեփական տեսակետներին:

Սկսած 1913 թվականից, երբ երիտթուրքական կառավարությունն ավելի պարզորոշ էր ցուցադրում իր հավատարմությունը նախկին վարչակարգերի վարած քաղաքականությանը՝ մասնավորապես հայ ժողովրդի նկատմամբ, «Աշխատանքն» ավելի հաճախ է սկսում հանդես գալ քննադատական հոդվածներով՝ ի շահ և ի պաշտպանություն սպանվող, թալանվող, հողագուրկ դարձող իր ազգակիցների: Շաբաթաթերթը վրդովվում էր խորհրդարանական ընտրությունների նախապատրաստական աշխատանքներում պետական այն քաղաքականությունից, որն ընտրական օրենսդրության մեջ կատարված փոփոխություններով, արևմտահայերին թույլ չէր տալիս իրենց թվի համեմատ պատգամավորներ ունենալ: «Աշխատանքը» գրում էր, որ Թուրքիայի նահանգային նոր օրենքը բացառում էր ազգային փոք-

² Նույն տեղում:

³ Նույն տեղում, N 3, էջ 14:

⁴ Նույն տեղում, էջ 15:

րամասնությունների քաղաքացիական իրավունքները. «Օսմանացի անորոշ յորջորջումը կը փոխարինէ ազգութեանց կոչումին: Իրաւանց ընդարձակում իբրեւ «չարագուշակ» հասկացողութիւն աղճատած է, և փոխանակ տեղական ընտրովի մարմինները իրաւանց այդ ընդարձակումէն օգտուելու, ընդհակառակ, ամեն բան վերապահած է նշանակովի պաշտօնեաներուն»⁵: Մի շարք հոդովածներում պարզաբանվում էր, թէ ինչո՞ւ Վանի հայ ընտրագանգվածը չէր մասնակցել Վանի վիլայեթի նահանգային ժողովի անդամների ընտրությանը: Հիմնական պատճառն այն էր, որ Թուրքիայի նահանգային նոր օրենքը դեմ էր հատկապէս հայ ժողովրդի շահերին: Բացի այդ, շաբաթաթերթը նշում էր, որ թէն Թուրքիայի ազգային փոքրամասնությունները պայքարում էին իրենց ազգային դիմագծի պահպանման համար, բայց նրանց ցանկանում էին դարձնել մեկ «ազգություն»՝ օսմանացի⁶: 1913 թ. խորհրդարանական նոր ընտրությունների առիթով Պատրիարքարանը հայ քաղաքական կուսակցությունների, խմբակցությունների և հարանվանությունների ներկայացուցիչների հետ կառավարությանն էր դիմել թագրիրով, որով պահանջում էր ապահովել հայերի համար համեմատական և ազգային ընտրությունների իրավունք: Այդ խնդրանքը մերժվում է: «Կառավարութեան ընթացքը նախատինք մըն է՝ ուղղուած ամբողջ հայ Ազգի հասցէին և անոր արդար ու յառաջադէմ պահանջներուն... Հայ Ազգը հաստատապէս որոշած է ապրիլ և չնահանջել իր պահանջներէն՝ ոչ մերժումներու և ոչ ալ ջարդի ու կոտորածի սարսափներուն առջեւ եւ ապրիլ ուրիշներու հետ հաւասար իրաւունքներով և հաւասար պարտականութիւններով: Անոր պահանջներէն եւ ոչ մէկը հակառակ եղած է օսմանեան պետութեան շահերուն և կամ դպած է սահմանադրութեան սկզբունքներուն: Ընդհակառակը, անոնք բոլորն ալ ուղղուած են դէպի մէկ նպատակ, այն է՝ հայ Ազգի բարգաւաճումը օսմանեան բարգաւաճ Հայրենիքի մէջ»⁷: Անդրադառնալով այս դեպքերին՝ շաբաթաթերթը կարծում էր, որ Թուրքիայում անհրաժեշտ էր ազգային համերաշխություն⁸: «Աշխատանքը» ներկայացնում էր այդ համերաշխությանը խանգարող երկու հիմնական պատճառ. «Թուրքերը կը մեղադրէին Հայերը, թէ ասոնք քաղաքական անջատման նպատակ ունին, և դեռ աւելին ալ՝ թէ կը ձգտեն օտար տիրապետութեան մը ենթարկելու Հայաստանն ու իր սահմանակից գաւառները, հայերը տակաւին հզօրապէս կամբաստանեն Թուրքերը, թէ ասոնք պարզապէս ջնջել կուզեն Հայ ցեղը Փոքր Ասիայէն, միակրօն և ապա տակաւ միատարր պետութիւն մը ձուլելու համար ոչ-հայ տարրերէն»⁹:

«Աշխատանքը» գրում էր, որ հայ ժողովուրդը ցանկանում էր իր «բնական հայրենիքին մէջ քաղաքական ազատ կարգեր ստեղծել, ո՞նէ պայմանով

⁵ Նույն տեղում, 1913, N 30, էջ 1:

⁶ Նույն տեղում, N 29, էջ 1-2:

⁷ Նույն տեղում, N 5, էջ 1:

⁸ Նույն տեղում, N 4, էջ 1:

⁹ Նույն տեղում, N 33, էջ 1:

չկաշկանդուած անկախ զգացում մը իրենց ազգային մշակոյթին և տնտեսական կեանքին»¹⁰:

1913-1914 թթ. «Աշխատանքը» քննարկման առանձին նյութ էր դարձրել հայկական վեց նահանգների հանդէպ եվրոպական վերահսկողության հաստատման հարցը: Վերլուծում էր Հայկական հարցին առնչվող բոլոր իրադարձությունները՝ ներկայացնելով Թուրքիայում այդ կապակցությամբ ծավալված քննարկումներն ու հայ և թուրք հասարակությանը մտահոգող խնդիրները: Այդ ամենի շնորհիվ «Աշխատանքն» այն տեսակետն էր առաջ քաշում, որ Թուրքիան մերժողական ու խիստ լեզու «կը բանեցնէ Եւրոպայի առաջարկած ծրագրի ու քօնթրօլի սկզբունքին դէմ: Օսմանեան կառավարութիւնը որոշած է բացարձակապէս մերժել ունէ ծրագիր կամ առաջարկ, որ կը ձգտի իրական քօնթրօլ հաստատել իր բարենորոգչական գործառնութեանց վրայ և դպչիլ իր անկախութեան»¹¹:

Հայերի վստահությունը թուրքական պետության նկատմամբ կվերականգնվեր, եթե կամ Եվրոպայի վերահսկողությունն հաստատվեր Թուրքիայի նկատմամբ, կամ իրագործվեր փոխադարձ վերահսկողություն հայ ժողովրդի և թուրքական իշխանությունների կողմից: Սա էր «Աշխատանքի» մոտեցումը: Ազգային համերաշխության հասնելու նպատակով շաբաթաթերթը պահանջում էր հաշվի առնել մի շարք առաջարկներ, որոնց իրականացումը կբացառեր եվրոպական վերահսկողությունը թուրքերի վրա: Ներկայացնենք դրանք առանց փոփոխությունների. «Ահա քանի մը պահանջներ.

1. Ազգային համեմատական ներկայացուցչություն Խորհրդարանին և նահանգային ժողովներուն մէջ,

2. Հայ նահանգներու սահմաններու սրբազրում, զատելով անոնցմէ քրտաբնակ կէտերը կամ բուն Քիւրտիստանին վերաբերող գաւառները, որպէսզի իւրաքանչիւր ցեղ իր բարքերուն եւ իր քաղաքակրթութեան աստիճանի և պէտքերուն համեմատ կարենայ առաջդիմել՝ առանց խոչընդոտ եւ արգելք դառնալու իր դրացիին,

3. Հայ նահանգներուն մէջ հայ ժողովուրդի թւին համաձայն հայ տարրին մասնակցումը կառավարական բոլոր ճիւղերուն-ժանտարմ, ոստիկանութիւն, զօրք, դատարան, պաշտօնէութիւն՝ անխտիր,

4. Հայաստանի զօրքը խաղաղ ժամանակ չպիտի հանւի հայ գաւառներէն դուրս: Պատերազմի ատեն կամ ո՛րէն առթիւ հայ զինուորներու քանակը Հայաստան գտնուող զինուորական ուժերու հարիւրին 50-էն նւազ չպիտի լինի»¹²:

«Աշխատանքը» «Պետական կյանք» խորագրի ներքո հիմնադրման օրվանից մինչև վերջին համարները հանդես է եկել պետական կառավարման համակարգում

¹⁰ Նույն տեղում:

¹¹ Նույն տեղում, N 4, էջ 2:

¹² Նույն տեղում, N 34, էջ 3:

եղած բացերի, թերությունների ու սխալների, որն է հարցի կամ ազգի նկատմամբ դրսևորվող կանխակալ կամ ծրագրված անարդար քաղաքականության դեմ: «Խօսելով իթթիհատի (կամ ներկայ կառավարութեան) մասին, իբրեւ միակ անկեղծ սահմանադրական և հայրենասեր տարր թուրքերի մէջ, չենք կարող չը մատնանշել այն բոլոր ծրագրային պակասութիւնները, որոնց պատճառով այդ կուսակցութիւնը չը կարողացաւ լիովին կատարել իր պատմական միսիան», - գրում էր Անցորդը «Բալկանյան կնճիռներ» հոդվածաշարի հինգերորդ հոդվածում¹³: Վերլուծականներին բնորոշ է այն, որ եզրահանգումներն արվում էին տեղային (Վանի և Վանի վիլայեթի) բնույթի խնդիրների ածանցմամբ, համադրմամբ և ընդհանրացմամբ: Վերոհիշյալ շարքի պատասխանատու Միրապոն թեև հոդվածներից մեկում անդրադառնում էր թուրքերի տեղական դատարանների գործունեությանը, բայց ընդհանրացնելով դրանցում առկա հիմնահարցերը՝ կառավարությունից պահանջում էր գտնել ընդհանրական լուծում: Նա փաստում էր, որ քայքայված տնտեսություն ունեցող Թուրքիայում և՛ նյութապէս, և՛ բարոյապէս միշտ տուժում էին ծայրագավառները. «Հոն կապրին ժողովուրդները՝ գրեթէ բաղդին թողած, հոն ժողովուրդը ստրուկ է եւ ո՛չ ազատ քաղաքացի»¹⁴: Հոդվածագիրը հանդես էր գալիս դատարանների կայացրած անարդար վճիռների դեմ և կարծում էր, որ հարկավոր էր բարեխղճությամբ վարել դատական գործերը՝ առանց կրոնական, ազգային կամ այլ կարգի խտրականությունների: «Աշխատանքն» անգամ բաց նամակ է հղել Վանի վերաքննիչ ատյանի ընդհանուր դատախազ Խայրետինին, որտեղ քննադատել է նրա ղեկավարած հաստատության աշխատանքը և թվարկել հայերի հանդեպ եղած ապօրինությունները¹⁵: Բռնութեան շրջանի դատարանները շաբաթաթերթը բնորոշում էր մեկ բառով՝ կամայականություն, բայց «մի թէ այդ թոյնը այժմ էլ պէտք է թունաւորէ մեր պետական օրգանիզմը: Ու ի՞նչ չարիքի արմատը: Կամ գործ, կամ հրաժարական», - այսպէս էր ամփոփում իր վերլուծությունը Միրապոն¹⁶: Իսկ չարիքների արմատը կենտրոնական կառավարությունն էր. սա էր շաբաթաթերթի հիմնական եզրակացությունը: Եթե Թուրքիայի վիլայեթների պաշտոնատար անձինք (օրինակ՝ Վանի բոլոր կազանները, նահյանները, գայմագամները, մյուստուրները, ժանդարմները) չէին վայելում կառավարության վստահությունը, եթե նրանք «անկարող էին ու ապիկար, ինչո՞ւ համար կեդրոնական կառավարութիւնը չէ՛ր բռնում նրանց թնից, չէ՛ր շարտում դուրս կառավարական օղակից, որպէսզի ո՛չ վարկաբեկէին կառավարութեանը, ո՛չ խաբէին իրանք իրանց և թէ ժողովուրդին»¹⁷: «Ավագակությունները» կոչվող խմբագրական-հոդվածներից մեկում բերվում էին նաև ասվածն ապացուցող թվային տվյալներ: Պարզվում է, որ 1910 թ. դրությամբ միայն

¹³ Նույն տեղում, 1911, N 7, էջ 15:

¹⁴ Նույն տեղում, 1910, N 2, էջ 6:

¹⁵ Նույն տեղում, N 5, էջ 9:

¹⁶ Նույն տեղում, էջ 7:

¹⁷ Նույն տեղում, N 3, էջ 3:

Վանի նահանգը ժանդարմներին պահելու համար հատկացնում էր 80.000 լիրա, բայց, միննույն է, թե՛ այս վիլայեթում, թե՛ Թուրքիայում ընդհանրապես շարունակվում էին անօրինությունները: «Աշխատանքը» հարց էր ուղղում կառավարությանը. «Եթե 80.000-անոց ժանտարմերիան անկարող է մի քանի տասնեակ աւագակները ոչնչացնելու, ապա ուրեմն ի՞նչն է արդարացնում նրանց գոյությունը»¹⁸: Շաբաթաթերթը նման գործելակերպը որակում էր որպես պետական ոճիր: Պարբերականի կարծիքով՝ իրավիճակից դուրս գալու ելքը ավագակների շահույթից իրենց բաժինն ունեցող և կաշառակեր պաշտոնյաների փոխարեն պետական մտածողության տեր մարդկանց պաշտոններ տալն էր: Բնարկե, սա խոցելի տեսակետ է, քանի որ որոշ չափով անտեսվում էր հայերի հանդեպ պետական գրեթե բոլոր կառույցների և օղակների կողմից իրագործվող հայահալած ծրագիրը: «Պետական կյանք» խորագրի մեկ այլ հրապարակման մեջ «Աշխատանքը» բերում էր պետական գանձարանի գումարների աննպատակահարմար իրացման փաստեր: Խոսքը մասնավորապես վերաբերում էր հանրօգուտ շինությունների կառուցման կամ վերանորոգման աշխատանքների համար պետությունից հատկացվող գումարներին: Կոնկրետ նշվում էր, թե պետական այս օղակի «յանցանքը աւելի մեծ էր», որովհետև Վանի վիլայեթում չէին բարեկարգվում ու վերանորոգվում ճանապարհները, կամուրջները և «վերջապես Խառակոնիս ու Խորզոմ եւ ընդհանրապես ծովափնեայ և լճափնեայ գիւղերը»¹⁹: Այդ բնակավայրերի բնակչությունն ստիպված լքում էր իր տուն ու տեղը: Պատճառների թվում թերթը նշում էր կամ «ջրարշաւէն ազատւելու» հանգամանքը, կամ անջրդի ու ջրագուրկ դարձած գյուղերում ապրուստի բացակայությունը, կամ գրում էր, թե «ծովը կը լափէ գիւղի արօտատեղիները, և անասունները կը մնան առանց խոտի»: Կամուրջների քանդվելու հետևանքով անանցանելի էին դարձել ճանապարհները և անհնար էր ապրանք փոխադրելը: Վատացել էին փոստային փոխանցումները: Պատճառների շարքում հիշատակվում էր անտառներից ծովափ կամ ծովափնյա գյուղեր գնացող կանոնավոր ճանապարհների բացակայությունը: Դրանով պայմանավորված՝ փայտը չէր բավարարում ժողովրդի կարիքները: «Աշխատանքը» վկայակոչում էր, որ կամուրջների և ճանապարհների շինարարության համար պետությունը Վանի վիլայեթին 1910 թ. հատկացրել էր 15.000 դուրուշ: Գումարը փոխանցվել էր տեղական գանձարանին: 9 ամիս անց պարզվել էր, որ կառուցվել էր ընդամենը հողե նավահանգիստ, որը մեկ տարի անց չէր ծառայելու իր նպատակին, քանզի ջուրն այն քանդելու էր շատ շուտով: Այդ ձեռնարկի վրա ծախսվել էր 1200 ոսկի: Ստացված բողոքները լուծելու համար կազմված վերաքննիչ մարմնի աշխատանքների վրա լրացուցիչ ծախսվել էր 768 ոսկի, որը, շաբաթաթերթի գնահատմամբ, «ջուր ձգւած ոսկի» էր, իսկ Թուրքիայի հանրօգուտ շինությունների հաստատության, ինչպես և կառավարական մյուս հաստատությունների գործունեությունը՝ հանցավոր և դատապարտման արժանի²⁰:

¹⁸ Նույն տեղում, էջ 4:

¹⁹ Նույն տեղում, N 3, էջ 5:

²⁰ Նույն տեղում, էջ 6:

«Աշխատանքի» քննադատություններն անկողմնակալ էին: Վանի վիլայեթի մի շարք պաշտոնյաների կատարած լավ գործերը դրվատելով՝ գրում էր, որ նրանց բացասական գործերի մասին լռելը թշնամություն էր երկրի նկատմամբ: Թերթն անբարոյականություն էր համարում բոլորի կողմից իբրև հանցագործ ճանաչված մարդկանց պետական բարձր պաշտոններ շնորհելը: «Ներկայիս կառավարութիւնը դարձեալ ընդունում է ժողովրդին ինչպէս մի անկամ զէրոյի հաւասար զանգւածի... Ինչո՞ւ չէ. դափն էլ ձերն է, գուննան էլ, չալէ՛ք ու խաղցէ՛ք: Աստված սիրէ՛ք, ո՞ւր են տանում մեր պաշտօններէնքը. դէպի լեռներ՝», - այս եզրահանգմանն էր գալիս շաբաթաթերթը²¹: Նա թուրքական կառավարությանը պարբերաբար կոչ էր անում ժողովրդին չհասցնել այն վիճակին, որ նա ոտքի կանգնի և պայքարի իր իրավունքների պաշտպանության համար: Հակառակ դեպքում թուրքական կառավարությունն ուժային կառույցներով պիտի ճնշեր նրան. «Իթթիհատականները ստիպւած են նրանց հետ խօսել թնդանօթների լեզուով»²²: Ստեղծված իրավիճակից դուրս գալու համար «Դրական պայման» խմբագրականում «Աշխատանքն» առաջարկում էր լուծել Թուրքիայի առջև ծառացած երեք առաջնահերթ հիմնախնդիրներ՝ հպատակների կյանքի, ունեցվածքի ապահովագրության, հողային, ճանապարհային և այլ կարգի հաղորդակցության հարցերը:

Ըստ շաբաթաթերթի, հողային հարցը մտահոգում էր ոչ միայն արևմտահայերին, այլև Թուրքիայում բնակվող բոլոր ազգերին: Այդուհանդերձ, «Աշխատանքը» համոզված էր, որ Թուրքիայում հողային հարցի լուծմանը առաջին հերթին սպասում էին հայ և քուրդ ժողովուրդները²³: Բնորոշ է «Քրդերը» վերնագրով վերլուծականը, որտեղ այն միտքն է արտահայտված, որ ժողովուրդը ցանկանում էր ունենալ իր սեփական հողը և դրա վրա ստեղծած իր տնտեսությունը, հող, որպեսզի կարողանա իր աշխատանքի արդյունքը վայելել²⁴: Պարբերականը կառավարությունից պահանջում էր հիմնովին և արդարության սկզբունքով վերջնականապես լուծել այս հարցը. «Պետութիւնը պարտաւոր է կանգնել Թուրքիայի ողջ գիւղացիութեան հոծ մեծամասնութեան հողային իրաւունքի պաշտպանութեան կողմը, վերջ տալու այդ դարաւոր անարդարութեանը, որը շարունակւում է եւ հիմա իր ամենալայն չափերով: Կառավարութիւնը պիտի դիմի արմատական միջոցների, արդարութեամբ վերջ տալու խրնդրին: Հողային հարցը գոյութեան ու մահւան խնդիր է, լինել, թէ չը լինելու հարց»²⁵: Իսկ «Հայ երկրագործին պահանջը» հոդվածում փաստվում էր, որ կառավարությունը 1908 թ. հուլիսի 10-ից հետո «ոչինչ ըրաւ» հողային հարցին բավարարում տալու առումով: Հայ

²¹ Նույն տեղում, N 4, էջ 9:

²² Նույն տեղում, 1911, N 7, էջ 15:

²³ Նույն տեղում, 1910, N 1, էջ 13:

²⁴ Նույն տեղում:

²⁵ Նույն տեղում:

գյուղացիության մեծամասնությունն իր պատմական բնօրրանում գուրկ էր հողից. «Նորա հողերը, իւր հայրենական կալուածները բռնապետական օրերից ի վեր յափշտակւած են: Հոգ...այս է մեր արդար պահանջը, այս է մեր բողոքի ձայնը այսօր էլ, վաղն էլ, եւ քանի դեռ մեր իրաւունքները, մեր հողերը կը յափշտակուին, քանի մեր սոված երեխաները, արիւն արցունքոտ աչերով ձեռք կը պարզեն դէպի մեզ եւ «հա ց-հա ց» կը պօռան, մենք էլ կառավարութեան օձիքից պինդ բռնած պիտի պահանջենք մեր իրաւունքը - հոգ - հոգ: Տուէ՛ք մեզ մեր արդար իրաւունքներից մեր հողը, որով ապրինք և ապրեցնենք»²⁶: Հետագա տարիների ընթացքում շաբաթաթերթը հողային հարցի հետ կապված մանրամասներ է տպագրել Արևմտյան Հայաստանի տարբեր գավառներում տիրող իրավիճակների մասին: 1913 թ. նույնիսկ կոչով դիմել է ընթերցողներին, որ նրանք տեղեկություններ ուղարկեն խմբագրություն՝ իրենց բնակավայրերում հողի հետ կապված խնդրահարույց իրավիճակների մասին: Թղթակցությունների հոսք է սկսվում: Դրանք հիմնականում զետեղվում էին «Հողային վեճ» կամ «Հողային հարց» խորագրերի ներքո: 1913 թ. նոյեմբերի 16-ին շաբաթաթերթը բացեիքաց հայտարարում էր, որ մշտապես տպագրել և շարունակելու է տպագրել արևմտահայերից կատարված հողային բռնագրավումների վերաբերյալ բազմաթիվ փաստեր, որոնք «ոչ կրնան հերքուիլ պաշտօնական կամ անպաշտօն հեռագիրներով և ոչ ալ աննպատակ յայտարարութիւններով»²⁷:

«Աշխատանքը» «Կրթական գործը գավառներու մեջ» շարքում բարձրաձայնում էր նաև կրթամշակութային խնդիրների լուծման անհրաժեշտության մասին: Կրթական թեմաներով հողվածներում անդրադառնում էր Վանի վիլայեթի գյուղական դպրոցների խնդիրներին և կրկին հանդես էր գալիս դրանց լուծման առաջարկներով: Այս շարքի պատասխանատուն Բարունակն էր: Շաբաթաթերթին հատկապես մտահոգում էր Վանի կենտրոնական վարժարանի ճակատագիրը, որը, չունենալով համայնքի ֆինանսական աջակցությունը, կանգնած էր փակվելու վտանգի առջև: Նա ընթերցողներին տեղեկացնում էր, որ հեղաշրջումից հետո Թուրքիայում հնարավորություններ ստեղծվեցին և հիմնվեցին հայկական դպրոցներ, գրադարան-ընթերցարաններ, նաև նշում էր, որ մասնավորապես Վասպուրականում գործում էին 120-130 հայկական դպրոցներ, իսկ «Մշոյ դաշտում և Սասունում Առաջնորդարանի և Դաշնակցական ընկերների ջանքերով բացել էին 78 վարժարան և նոյն բանն էր նկատում նաև Կարինի, Տիարպեքիի, Վանայ և այլ վիլայեթներում», բայց վանեցիները կարծես չէին կարևորում երկրորդական դպրոցի անհրաժեշտությունը²⁸: Այս խնդրի առնչությամբ գրված բազմաթիվ հողվածներում փաստերով հիմնավորվում էր երկրորդական վարժարանի անհրաժեշտությունը: «Կեդրոնականը պետք է ապրի» հողվածում, օրինակ, հեղինակը՝ Ասպետը, հռետորական հարց է տալիս. «Ո՞րն է աւելի անհրաժեշտ Վանի համար. Կեդրոնական երկրորդական վարժարա՞ն մը, թէ՞ վարժապետանոց մը, որը

²⁶ Նույն տեղում, 1911, N 13, էջ 15-16:

²⁷ Նույն տեղում, 1913, N 3, էջ 1:

²⁸ Նույն տեղում, 1911, N 10, էջ 6:

պիտի պատրաստի ուսուցիչներ»²⁹։ Ինքն էլ փորձում է պատասխանել. «Վարժապետանոցէն առաջ և նոյնիսկ անոր գոյութիւնը արդիւնաւոր դարձնող, նախակրթարաններ եւ երկրորդական դպրոց մը անհրաժեշտ է»³⁰։ Շաբաթաթերթն այնքան էր կարեւորում կրթական հարցի լուծումն արևմտահայության համար, որ գրում էր, թե այդ հարցը «պէտք է որոշէ Թիւրքիոյ բաղկացուցիչ մասերի դիրքը ընդհանուր Օսմանեան հայրենիքի մէջ։ Ցաւալի է, որ Երիտասարդ թուրք կառավարութիւնը կամաց-կամաց լայնացնելով ազգային խորթութեան անջրպետը, աջ ու ձախ ազգային պոռթկումների և հրաբխային ցրնցումների դուռն է բանում, եւ մասնավորապէս կրթական հարցի վերաբերմամբ»³¹։ Ի վերջո, 1913 թ. դեկտեմբերի 14-ին «Աշխատանքն» առաջարկում էր հետևել եվրոպական այն զարգացած երկրների փորձին, որոնցում կային ազգային երկրորդական դպրոցներ, և ստեղծել երկու ընկերություն, որոնք գումար կներդնէին Վանի Սանդիստյան և Կենտրոնական վարժարանների կարիքները հոգալու համար։ «Ժամանակն է, որ հաւաքական ձեռնարկներով ամրապնդենք հայ կրթութիւնը, ազգային դաստիարակութեան գործը։ Ահա գործունէության ասպարէզ մը, ուր կրնան մեծ գործ կատարել հասարակութեան բոլոր խաւերը հաւասարապէս»³²։

Կրթական հարցին նվիրված հոդվածներում մատնաշվում էին առկա թերությունները։ Ասենք, օրինակ՝ Վանի վիլայեթի դպրոցներում կրթական գործը լիովին չէր վերահսկվում ուսումնական խորհրդի, թաղական մարմինների, հոգաբարձուների և խնամակալների կողմից։ «Ուսումնական նոր շրջանը» հոդվածում առաջարկվում էր վերակազմել ազգային կրթական համակարգը և դպրոցների ուսումնական գործընթացը, որոնք միշտ «երեսէ ձգւած, անուշադիր մնացեր էին, եւ ատով տուժեր էր մեր դպրոցական սերունդը այս կամ այն հանգամանքով»³³։ Հայկական դպրոցների անմխիթար կացությունը բարվոքելու համար հոդվածագիրը պատասխանատու մարմիններին առաջարկում էր ուշադրություն դարձնել հետևյալ ուղղությունների վրա.

«1. Վանի և արւարձաններու հետ մէկտէղ ուշադրութեան առնել թեմական շրջաններու գավառական դպրոցներու խնդիրը,

2. մեր ներկայ ուսուցչութեան թւական եւ բարոյական որակը,

3. դպրոցներու ուսումնական ծրագրի հարցը,

4. դպրոցական պիւտճէ և հոգաբարձուներ,

5. ուսումնական ընդհանուր դասախօսությունները,

6. ուսումնարաններու առողջապահական վիճակը»³⁴։

Ազգային դպրոցների բարեփոխման և բարենորոգման ծրագրերի քննարկումներից բացի՝ «Աշխատանքը» փորձում էր նպաստել աճող սերնդի

²⁹ Նույն տեղում, N 17, էջ 3:

³⁰ Նույն տեղում, էջ 5:

³¹ Նույն տեղում, N 7, էջ 3:

³² Նույն տեղում, 1913, N 7, էջ 1:

³³ Նույն տեղում, N 33, էջ 4:

³⁴ Նույն տեղում:

հոգևոր-մշակութային մակարդակի բարձրացմանը: Այդ նպատակով իր էջերում տպագրում էր և՛ ճանաչողական ու գիտահանրամատչելի հոդվածներ, և՛ արվեստի ու գրականության տարբեր խնդիրների վերաբերյալ գրույցներ: Թերթը տպագրում էր ոչ միայն արևմտահայ և արևելահայ, այլև օտարազգի գրողների լավագույն ստեղծագործությունները: «Գրական ակնարկներ» շարքում ժամանակի գրողները բանավիճելու հնարավորություն ունեին մշակույթի ու գրականության զարգացման ուղիներին առնչվող հարցերի վերաբերյալ: Շարքի պատասխանատուն Օրիոնն էր: «Աշխատանքը» համոզված էր, որ աշխարհաքաղաքական հանգամանքների բերումով երկու հատվածի բաժանված հայ ժողովրդին միայն գրական-մշակութային վերածնունդը հնարավորություն կտար, որ արևելահայն ու արևմտահայն ապրեին նույն ձգտումներով: «Մենք հաւատում ենք, որ մի գեղեցիկ օր հեռու ապագայում նոր սկսած կեանքը, նոր գրական վերածնունդը մեզ պիտի միացնե, խորտակելով և լեցնելով բոլոր բաժանող անջրպետները», - գրում էր Օրիոնը³⁵: Նա խոսում էր այն ցավոտ գրական երևույթի մասին, որ ի տարբերություն արևելահայ գրականության՝ արևմտահայ գրականությունը չէր արտացոլել արևմտահայ կյանքն իր բոլոր կողմերով: Արևմտահայ գրականությունն իրականում պոլսահայ գրականությունն էր. «Մեր գաւառը՝ Կարին, Մուշ, Պիթլիգ, Վասպուրական, Տիգրանակերտ, Խարբերդ, աւաղ, չեն ունեցել իսկական մտքով, գրական, մտաւորական կեանք: Եւ Պոլսի ստեղծածը չի ժողովրդականացել, խորունկ արմատ չի ձգել: Սա փաստ է, կենդանի իրողութիւն»³⁶: Հողվածագիրը, սակայն, ծայրահեղության էր հասնում, երբ գրում էր, թե Կ. Պոլսում ստեղծված գրական ստեղծագործությունները չեն արտացոլել ժողովրդի կյանքը, նրա իդէերն ու ձգտումները, թե դրանք կտրված են մայր գրականության ակունքներից: Արևմտահայ գրականության զարգացումը շաբաթաթերթը տեսնում էր գավառի հետ կապերը սերտացնելու և այն արտացոլելու մեջ. «Ահա նորագոյն գրականութեան կեանք տուող մեծ կեդրոնը, որի շարժումը արձանագրելը պիտի լինի մեր գրական կեանքի իսկական նպատակը: Ահա թէ նա իր կենսունակութիւնը որտեղից պիտի ստանայ»³⁷:

«Աշխատանքը» կարծում էր, որ արևմտահայությանը մտահոգող հողային, կրթական և այլ կարգի հիմնահարցերը լուծելու համար հարկավոր էր ուժեղացնել հայ համայնքը, ամրապնդել գավառի և Կ. Պոլսի կապերը, համախմբել արևմտահայ սերուցքը և համատեղ ուժերով փորձել Թուրքիայում իրենց ընձեռնված հնարավորությունների սահմաններում փորձել, նախ՝ փնտրել, գտնել դրանց հասնելու միջոցները, ապա՝ աշխատել գործնական լուծում տալ դրանց: Հասկանալով, որ այդ ամենը գուցե և անհնար է այն օրերի աշխարհաքաղաքական

³⁵ Նույն տեղում, 1910, N 2, էջ 14:

³⁶ Նույն տեղում, էջ 9:

³⁷ Նույն տեղում, էջ 15:

հանգամանքներում՝ թերթը, այդուամենայնիվ, իր հրապարակումներում անընդմեջ անդրադառնում էր հիշյալ խնդիրներին: «Աշխատանքն» իրատես էր և իրերն անվանում էր իրենց անուններով՝ ի տարբերություն Թուրքիայում այդ շրջանում հրատարակվող մի շարք այլ պարբերականների: «Բաժանիր, որ տիրես» քաղաքականության հետևանքով Թուրքիայում վաղուց ի վեր խրգվել էին կապերը արևմտահայ վիլայեթների (գավառի) և մայրաքաղաք Կ. Պոլսում կենտրոնացած մտավոր ներուժի միջև: Այս հարցերին էր նվիրված «Պոլսահայ կյանք» վերլուծական հոդվածաշարը: «Պոլիս գոյություն չունե՞ր գաւառներու հայութեան համար, նա խորթացած մէկ հատուած միայն կը նկատուէր, որ ի վիճակի չէր միանալու, նոյնանալու հայկական տանջանքներուն հետ: Բայց պայմանները այժմ փոխուած են, գաւառացի հայը անհրաժեշտաբար պէտք է որ հետաքրքրուի Պոլսահայերու գործերովն, որովհետև ասոնք կապ ունեն իր ազգային կեանքին հետ: Պոլիս իբրեւ ազգային գործերու կեդրոն, իր ձեռք առած է նաեւ դէկը ազգային բոլոր գործերուն, որոշումներ, կարգադրութիւններ կընէ, առանց նկատի ունենալու գաւառի իրականութիւնը, անոր բազմաթիւ կարիքները: Հետեւաբար անմտութիւն կը լինէր գաւառացի հայութեան կողմէն ցոյց տրուելիք նախկին անտարբերութիւնը, որ ներկայիս իր գոյութեան իրաւունքէն զրկուած է», - գրում էր հոդվածագիրը՝ Ասաֆը³⁸: Նրա կարծիքով՝ պոլսահայ մտավորականները կամ «ազգային ջոջերը» իրականում շահագրգիռ էին ոչ թե ազգային խնդիրների լուծմամբ, այլ՝ «անձնական շահերու ցանցով մը պատուած» հարցերի շահարկմամբ³⁹: Այդպիսի ազգասերը թույլ չէր տալիս ազգի հասցեին որևէ վիրավորական բառ ասել, բայց գավառացու անունը լսել չէր ուզում. «Երբ աշխատաւոր գիւղացիութեան, գաւառի հայութեան թշուառութեան մասին կուզես խօսել, նա քայլերը կ'արագացնէ, երբ հարիւրաւոր որբերու վիճակը կը նկարագրես, «ազգը սաղ մնայ» կըսէ ու խօսքը կը փոխէ: Բայց եթէ հարցնես՝ ո՞վ է ազգը, նա պիտի պապանձէր կամ շատ-շատ «ազգ»-ին քով պիտի կցէր «հայ» բառն ալ, զոր երբեմն կը մոռնայ: Թերեւս ոչ մէկ տեղ «ազգ» բառը այնքան չ'է յեղեղուած ու այլանդակուած, որքան Վօսփորեան այս ամիսներուն վրայ, և կը շարունակուի այդ բառի շահագործումը՝ «ի սէր» մըն ալ առջեւ աւելցնելով իբրեւ անբաժան նախդիր», - այսպիսի հեզնանքով էր արտահայտվում պոլսահայ մտավորականության ու ազգային գործիչների մասին «Աշխատանքը»⁴⁰ և նույնիսկ ազգային ուժերի պառակտման մեջ էր մեղադրում պոլսահայ մտավորականներին. «Պոլիսը խորթ, դաւաճան մայրն է հայութեան: Նա չի ծառայում իւր գաւառներին և մեր ազգային կեանքի առաջացման ճանապարհի վրայ ընկել է որպէս խանգարիչ հսկայ քար»⁴¹:

Ազգային կառույցների ու գործիչների հասցեին «Աշխատանքի» էջերում հնչող մեղադրանքներն անհիմն չէին, թեև հաճախ ունեին անհարկի խստություն և պահանջկոտություն: Շարաթաթերթը չէր կարողանում առանց արգաստահանքի և

³⁸ Նույն տեղում, 1911, N 2, էջ 8:

³⁹ Նույն տեղում, էջ 10:

⁴⁰ Նույն տեղում, էջ 11:

⁴¹ Նույն տեղում, էջ 6:

զայրույթի խոսել հայկական գավառների ազգային հաստատությունների մասին՝ սկսած երեսփոխանական ժողովից, Առաջնորդարանից և վերջացրած հոգաբարձություններով ու թաղականություններով⁴²։ Դրանք աչքի էին ընկնում իրենց անբարեխիղճ և անկանոն գործելակերպով։ Օրինակ՝ Վանի քաղաքական ժողովն ու թաղականություններն արժանանում էին պարսավանքի նաև այն պատճառով, որ վերածվում էին թուրքական իշխանությունների ձեռքին նայող մուրացկանների, այնինչ «Հավիտենական մուրացկանները» հողվածի հեղինակ Ա. Մարմարյանի կարծիքով՝ հայոց ազգային հաստատությունները ղեկավարող մարմինները ոչ թե պիտի ենթարկվեին կենտրոնական իշխանությունների պահանջներին, այլ պաշտպանեին արևմտահայության շահերն ու վարեին ազգային քաղաքականություն⁴³։

Իր ամենաբարձր թողարկումներում թերթը լուսաբանում էր թե՛ օսմանյան խորհրդարանի (Կ. Պոլսի «Ազատամարտ» օրաթերթից կատարված արտատպումների միջոցով), թե՛ Վանի Ազգային կենտրոնական ժողովի, թե՛ ազգային կյանքը կառավարող մնացած կառույցների աշխատանքները։ 1913 թ. 29-րդ համարից (հունիսի մեկից) սկսած՝ խմբագրականները զուգահեռաբար տպագրում էր թուրքերենով՝ թուրք ընթերցողների համար։ Բացվում են նաև նոր խորագրեր՝ «Հողագրավումներ», «Գավառի և Վանի կյանք», «Եվրոպա և Հայկական հարցը», «Վիճակագրական», «Երեսփոխանական ժողով» և այլն։ Ուշագրավ և հետաքրքիր են Ազգային կենտրոնական ժողովի աշխատանքների վերլուծությունները, որոնք ոչ միայն պատկերացում էին տալիս 1910-1915 թթ. Վանի վիճակի ազգային ներքին խնդիրների մասին, այլև ընթերցողներին հնարավորություն էին ընձեռում ծանոթանալ «Աշխատանքի» տեսակետներին ու առաջարկներին։ Ըստ այդմ՝ 1913-1914 թթ. Վանի Ազգային կենտրոնական ժողովում քննարկվող հասարակական ամենամեծ հնչողություն ունեցող հարցը ժողովրդի արտագաղթն էր։ «Արտագաղթը» վերնագրով հոդվածաշարի հեղինակ Իշխան Միքայելյանը ներկայացնում էր արտագաղթի հիմնական պատճառները. աշխատանքի բացակայությունը, քաղաքական անորոշ կացությունը և անապահովությունը, հաղորդակցական միջոցների պակասը, առաջացած տնտեսական տագնապը։ Ի. Միքայելյանը գրում էր, որ արևմտահայության մեջ 100-ից 70-ն ապրում էր գյուղերում՝ զբաղվելով երկրագործությամբ, իսկ քաղաքներում կենտրոնացած մնացած մասն իր օրվա հացը վաստակում էր առևտրի և արհեստների միջոցով։ Երկրագործությունը շատ դժվարությամբ էր ապահովում բնակչության կարիքները. «Հայ գիւղացիութեան արդիւնաբերութեան սպառումը տեղական է։ Նա ոչ միայն հնարաւորութիւն չունի արտածելու օտար երկիրներ, այլեւ՝ մի նահանգէն միւսը։ Մշո դաշտ, Պոլսանըդ, Արձեշ և Ալշավազը եթէ ունենային արտածման հնարաւորութիւն, գուցէ անոր ներկայ արդիւնաբերութիւն իւր քանակով մէկէն ութ անգամով աւելնար»⁴⁴։ Ճանապարհների բացակայությունը կամ դժվարանցանելիությունը, թալանի վտանգը հայ գյուղացուն խանգարում էին իրացնել իր աշխատանքի արդյունքները

⁴² Նույն տեղում, 1911, N 9, էջ 8:

⁴³ Նույն տեղում, N 3, էջ 13:

⁴⁴ Նույն տեղում, 1913, N 36, էջ 13:

(յուդ, պանիր, բուրդ և այլն), իսկ բարձր լեռնային շրջաններում ապրողներն զբաղվում էին նահապետական աստիճանի վրա գտնվող տնայնագործությամբ: Սոցիալական վատ վիճակում էին նաև առևտրով կամ արհեստներով զբաղվող արևմտահայերը: Ի. Միքայելյանը կոնկրետացնում էր խոսքը. «Վան վիլայեթը, որու բնակչության թիվը չի հասնել 400.000-ի, Կեդրոնով եւ գաւառակներով միասին ունի 3500-4000 առևտրական խանութներ, որոնցմէ մեծ մասը կամ ողորմելի եւ արհամարհելի դրամագլուխ ունին, կամ անվստահութեամբ է, որ գործ կը դարձնեն»⁴⁵: Արտաքին քաղաքական հանգամանքներն ստիպում էին, որ այդ խանութները կամ փակվեին, կամ վնասով աշխատեին: Իրենց արտադրանքի իրացման համար լայն շուկա չունեին նաև արհեստավորները: Առաջանում էր լրացուցիչ աշխատանք փնտրելու պահանջ՝ կարիքների բավարարման նպատակով: Թուրքիան, սակայն, «չի մատակարարէր անոր աշխատանք, ու հայ գիւղացին կը բռնէ Կովկասի եւ Ամերիկայի ճանապարհը»⁴⁶: Երկիրը հիմնականում լքում էին երիտասարդները: Միակ միջոցարական հանգամանքն այն էր, որ «հայերու՝ օտար երկիր մեկնիլը, գոնէ Վասպուրականի մէջ, ո՛չ թէ գաղթի, այլ գուտ պանդխտութեան բնոյթ ունի»⁴⁷:

«Աշխատանքն» ազգային մարմիններից պահանջում էր լիարժեք գործունեություն, թեև հասկանում էր, որ Թուրքիայում ամեն քայլափոխի արգելքներ էին դրվելու՝ այդ աշխատանքը խափանելու համար: «Այսօր հայ ժողովուրդը միաբերան ամեն տեղից, ամեն վայրից իւր ցաւերի, իւր հսկայ տանջանքի մասին է բարբառում, իսկ այդ ազգային կոչւող մարմինները... Ի՞նչ են անում նրանք: Ոչինչ և ոչինչ: Զգուշացէ՛ք, մեծ պիտի լինի գաւառի ժողովրդի ցասումը, ինչպէս մեծ է նրա համբերողութիւնը և տանջանքը»⁴⁸: Օտարները չէին օգնելու հայ ժողովրդին. «Հայութեան տանջանքը և շահերը ծնւել ու ծառացել են գաւառում, և նրա դարմանումը պիտի սկսի ինքը գաւառը»⁴⁹: Իսկ դրա համար անհրաժեշտ էր «ազգային ընդհանուր շահերի և ընդհանուր խնդիրների վերաբերմամբ համերաշխութեամբ ու միասնութեամբ գործ կատարել: Լաւ է ուշ, քան երբէք», - եզրակացնում էր «Աշխատանքը»⁵⁰:

Արդեն 1913 թ. վերջերին և 1914 թ. սկզբներին, գիտակցելով հանդերձ, որ եվրոպական դիվանագիտությունն իր շահն էր հետապնդում, պարբերականը գրում էր, որ ամեն դեպքում պիտի շարունակվեր պայքարը՝ հայկական նահանգների բարենորոգման ծրագրի իրականացման համար⁵¹, իսկ հայ

⁴⁵ Նույն տեղում, N 38, էջ 3:

⁴⁶ Նույն տեղում, N 36, էջ 4:

⁴⁷ Նույն տեղում:

⁴⁸ Նույն տեղում, 1910, N 5, էջ 5:

⁴⁹ Նույն տեղում, 1911, N 2, էջ 6:

⁵⁰ Նույն տեղում:

⁵¹ Նույն տեղում:

ժողովուրդն անցյալի դառն ու արյունոտ փորձերից հետո իրավունք ուներ չհավատալու թուրքական իշխանությունների անկեղծությանը. «Չեղաւ օր մը պատմութեան մէջ, որ թուրք կառավարութիւնը խօստանար ու կատարէր, չեղաւ օր մը, որ անոր խօսքին անմիջապէս յաջորդէր գործը»⁵²: Ցավալի փաստ է այն, որ 1915 թ. փետրվարին Վանի երեսփոխան Օննիկ Դերձակյանը (Արշակ Վռամյան) Թուրքիայի ներքին գործերի նախարարություն ուղարկած նամակում դեռևս չէր կորցրել հույսը, թե հնարավոր էր համերաշխություն հաստատել և վստահության ոգի ներարկել հայ ժողովրդի մեջ իր կյանքի ապահովության համար: Նա այդ նամակում գրում էր. «Ոչ մէկ կողմը բան մը կրնայ շահիլ, եթէ ծածկուի սա իրողութիւնը, թէ հայ զինուորներու զինաթափումը, հայ անգէներու ստրուկի նման աշխատացուիլը, տեղական իշխանութեանց անհարկի խստութիւնները եւ տեղի ունեցած ջարդերն ու թալանները ակամայ կուգան նորոգել յուշերը 1895-1896-ի համիտեան սև օրերուն: Ատանայի ջարդը, հողային և այլ կարգ մը խնդիրներու առկախ մնալը այն կասկածը ներշնչեցին հայերու մէջ, թէ դժոխային նպատակ մը կը սնուցուի հայ ժողովուրդի բուն իսկ գոյութեանը դէմ»⁵³:

1915 թ. ապրիլի 3-ի լույս 4-ի գիշերը թուրքերը ծուղակ են լարում ու թիկունքից դավադրաբար հարձակվելով՝ անհավասար կռիվում սպանում են թուրքերի խնդրանքով ապստամբած այգեստանցիների հետ հաշտության բանակցությունների գնացած Իշխան Միքայելյանին, նրա 3 ընկերներին: Վերջինիս նահատակությունից հետո «Աշխատանքի» խմբագիր - հրատարակիչն է դառնում ՀՅԴ հայտնի գործիչ Հմայակ Մանուկյանը, իսկ շաբաթաթերթը հրատարակվում է արդեն շաբաթը երկու անգամ՝ չորեքշաբթի և շաբաթ օրերին: Հմայակ Մանուկյանի խմբագրությամբ լույս տեսած «Աշխատանքը» հիմնականում անդրադառնում էր եղեռնին՝ նորաբաց «Կացությունը գավառների մեջ» խորագրի ներքո: Բնորոշ է, որ թերթը, օրագրային հրապարակումների ձևով ներկայացնելով Վանի 30-օրյա ինքնապաշտպանությունը, կարծես ձգտում էր ազատագրական պայքարի ոգի ներարկել ընթերցողների մեջ, որոնց շրջանակն արդեն սահմանափակվում էր միայն Վան քաղաքով: «Աշխատանքը» վրեժի էր կոչում ամենքին. «Այսօր Հայաստանն է արհնանների, որ ՎԸԺ կը գոռայ: Այսօր հայկական արհնազանգ բարձրավանդակի վրայ սրախողխող հազարաւոր հայ դիակներ, յօշոտուած մարմիններ, բռնաբարուած կիներ, պղծուած աղջիկներ ՎԸԺ կը պօռան: Կը լսէ՞ք, վասպուրականցիներ, կը լսէ՞ք»⁵⁴: Կոչ էր անում նաև համախմբվել ինքնապաշտպանական մարմնի, կամ, իրենց խոսքերով ասած, Վանի կառավարության շուրջ՝ քաղաքը վերականգնելու, թուրքերի հարձակումներին դիմադրելու և շրջակա գյուղերի ու քաղաքների հայ ազգաբնակչությանը ջարդերից

⁵² Նույն տեղում:

⁵³ Նույն տեղում, 1915, N 23, էջ 2:

⁵⁴ Նույն տեղում, N 22, էջ 1:

փրկելու համար: Սակայն թե՛ «Աշխատանքի» խմբագրակազմի, թե՛ Վանի ինքնապաշտպանության մարտիկների ազգափրկիչ ջանքերը չիրականացան: Այնուամենայնիվ, հայ ժողովուրդը կարողացավ ոտքի կանգնել, վերակենտել իր պետականությունը և շարունակել պայքարը հանուն Հայոց ցեղասպանության միջազգային ճանաչման, և Թուրքիան ի վերջո պիտի փոխհատուցի մեր ժողովրդի կրած նյութական ու հոգևոր կորուստները:

**ЕЖЕНЕДЕЛЬНАЯ ГАЗЕТА “АШХАТАНК”,
ИЗДАВАВШАЯСЯ В Г. ВАН (1910-1915 ГГ.)**

ОВСЕПЯН М. В.

Резюме

Еженедельная газета “Ашхатанк” являлась местным органом периодической печати АРФ-Дашнакцутюн, проводником ее идей. Газета освещала жизнь и проблемы Ванского вилайета и играла консолидирующую роль в судьбе армянской нации.

С течением времени “Ашхатанк” стал рупором общенациональных проблем. В период героической самообороны Вана газета живо откликалась на те или иные проблемы внутренней жизни ванцев, в числе которых особое место занимали вопросы самоуправления Вана.